

國朝詩人徵略二編

國朝詩人徵略二編卷二十五

番禺張維屏子樹輯

彭端淑

字樂齋四川丹稜人雍正十一年進士官廣東肇
羅道有白鶴堂詩文集

樂齋先生以進士官吏部澹無好也獨肆爲古文
章夫蜀自相如揚雄王褒林鴻孺之徒以文著乎
漢而常璩陳子昂唐庚文同蘇氏洵軾轍繼盛爭
耀先生出其後將與上下而抗其間乎夫以爲未
至而益造乎無窮其文所以異於世已

胡稚威
文鈔

樂齋以詩古文名蜀中自吏部郎出爲西粵監司

未幾歸主錦江書院樂齋詩大抵質實厚重不爲

聲悅之習者也

湖海詩傳

二百年來蜀中詩人以船山爲最樂齋五七律不

及船山至五言古詩蒼健沉鬱大有杜意似非船

山所能及

聽松廬詩話

彭樂齋曰詩有三不作押韻可不作險韻可不作

尋常應酬可不作

白鶴堂詩話

樂齋謂押韻詩可不作蓋卽次韻限韻之類船山

云怕讀人間趁韻詩勉強押韻皆趁韻也

聽松廬詩話

櫟題

由硤石出肴谷

金牛峽

大士巖

皆五古

摘句

禹功不到處宇宙多怪變

龍洞背

百川奔夔門連峰走劍閣

登同慶閣

長劍倚天門巨石裂地軸萬古峙崢嶸雄

關壯巴蜀

劍門

凜凜入峽門江山勢相湊遙吞一葉舟怒

浪空中吼衆篙不停手奮力與水鬪得失

介毫釐一誤不可救

峽門

黃河與太行氣勢兩相壓洶濤挾地流奇

峯倚天插逶迤蟠中原雄勝天下甲

望太行

盛年懶讀書頭白方知悔

秋風清渭水衰柳霸陵橋

霸陵

千帆通外內兩粵劃西東

登五層樓

年華催白髮風雨妒黃花

重陽

花殘寒食雨春老杜鵑聲

清明

濃雲沉大壑急雨失前村

途中遇雨

長貧身易老久病藥無靈

遣懷

不緣經勝地焉得發奇思

書工部入蜀詩後

塵世久諳交自息柴門雖設日常關

同心兄弟眞師友得意文章祇性情

王洛

字仲涵號懷坡又號慕菴安徽桐城人雍正十一年進士官吏部稽勲司郎中有懷坡詩鈔

懷坡係翰編參藩大初曾孫拔貢由樂城令歷河南彰德府知府珣之孫歲貢生侯選訓導景之子幼失怙家道中落同兄己酉孝廉沂銳志讀書事母至孝弟兄同遊泮水丙午鄉捷癸丑成進士改官西曹補雲南司主事升山東司員外郎佐理庶獄多所平反保送御史記名旋丁內艱服闋赴補原官隨升吏部稽勲司郎中兼辦考功司事充

甲子丙戌丁亥等十一科文武鄉會試同考官得
劉躍雲等百餘人後皆顯達人均服其藻鑑病歸
主講豫章書院十三載課士謹嚴羣相推敬甘立
猷項家達周厚輟涂以輟等俱受業以成名者妻
張氏博通經史詩詞書畫靡不精良著有閨中唱
和詩集淪靈文集懷坡詩鈔行世

安徽通志

吾見世之言詩者矣一登朝貴則習爲華靡和緩
之音務去其鱗鬣之而之稜稜者曰九苞之采雝
雝喈喈是爲和聲鳴盛世也子不見古之鳴盛世
者乎元音叢脞虞廷之歌也宜鑒於殷文王之什

也與今所云特異是又何說懷坡先生亦鳴盛世者而詩辭風格具存善藏其骨不失常代諸賢之則當與西樵茶村諸人競爽視夫華靡和緩者不

負乎遠哉

懷坡詩鈔序
姚廉訪聲撰

姚石甫廉訪書來道及王懷坡司勳詩蓋姚王兩家世有姻誼懷坡司勳乃薑塢編修之姪子也今年司勳之孫復之茂才來粵因獲見司勳之詩亟爲標其佳篇摘其警句刻之惟中有三卷未見付來未獲徧觀無從選摘矣

聽松廬
詩話

懷坡有冉伯牛墓絕句云蒼蒼古木竦高珉茅苴

流歌慘不春陋巷無年牛又病欲將德行勸何人

後二句沉痛可作天問讀

聽松廬詩話

詩有以不作爲作而命意愈高者杜茶村句云平

生只是知慚愧逢着梅花不作詩王懷坡句云惟

伊與我羞凡語快讀離騷莫賦詩覺梅菊愈高

同上

標題 清溪二生祠 海昌卜節婦詩 陶令北

窗

以上五古

劉烈母殉節詩 題毛友桐運

使授經圖 瀟碧學士山水 古靈泉

褚堂招賞杏花 題仇英醉翁亭圖 周

孝婦歌

以上七古

摘句

聲起淮之右論卑秦以來

醴谷貽近詩次韻合之

饑驅千里外貧活一身多

示心逸

民方新得母士故樂爲師

送張蔭泉之新城

酒兼螯左右菰其悲春秋

和介亭

足睡堪酬懶非吟可廢言

兆峽雨阻

兩世今惟吾與汝一經方待後承先

兄子入塾

蚤有高懷樂絃誦別無真境敵桑麻

送別

眼送流光今老至魂銷天氣自春來

題畫落花

寒蘆花上人家住黃葉林間櫓唱來

江上雜詩

驅除凡影空空積澹盡人心寂寂飛

大雪

流水自迷晨肇洞春風如訴息嬌心

白桃花

預斯契者非凡客老是鄉中最上禪

頌酒

時雨忽催爭地笥好風輕送上茵花

閒吟

落紅易誤尋春杜老樹難堪舊種桓

踏春

試水人猶佯墜去點篙身似謬恭來

舟居雜詩

遙山好似無名畫舊史將同不解基

煙波無恙魚之樂風雨不驚龍所都

漁

多種桃花照春水不妨雞犬奉神仙

漁

集中漁樵耕牧作至數十首余愛其詠

漁佳句錄之樵耕牧佳句俟補

聽松廬詩話

徐逢舉

字 廣東東安人乾隆二年進士

逢舉雍正丙午登賢書乾隆丁巳成進士好學性
成束髮卽擁書坐臥分積寸累窮年攻苦金折膠
流所爲文皆繩尺縝密試無不捷或請其秘則曰
聖賢義理能時時體會之臨文意味自出矣否則
以局外人談局中事奚涉焉乾隆五年主講瀧東
書院修邑志悉由手定時邑侯莊公其同譜進士
也交稱忘形逢舉從不干以私惟以篤志敦行課

子弟銓官未赴而卒

東安縣志

潘荻舫明經

世清

攜東安縣志三瀧詩選靜寄軒

詩過余言曰徐君逢舉曾君受一葉君荆皆東安

君子也請輯入詩人徵略以廣其傳余覽縣志及

葉學博傳知荻舫之言不虛因亟登之

松心文鈔

拘句 風雨互相傾蛟龍未肯宿胡然鋤汗功一

朝付水族

辛酉五月連漲田廬被淹淒然有作

花開公主宅柳暗亞夫營

通州道中

截流歸釣艇亂樹嘯山風

胥江雨泊

朝廷有劍誅新莽漢室無官易富春

嚴陵釣臺

愧我不才空抱拙勞君下榻喜相迎

贈彭崑源

國朝詩人徵略二編卷二十七

番禺張維屏子樹輯

阿桂

姓章佳字廣庭號雲巖滿洲人乾隆三年舉人官至大學士封一等誠謀英勇公贈太傅諡文成

乾隆三十六年大兵征金川三十八年降番復叛攻陷木果木定邊將軍溫福陣亡

特旨授公定西將軍三十九年正月公奏言現於山岡添築礮臺將大礮運往儘力轟摧六月公又奏言將鑄成礮位運赴礮臺攻擊甚爲得力打中賊礮擊

斃賊眾奉

上諭現在軍營鑄礮銅鐵源源運往鑄礮銅鐵必須鍊淨
方爲有益著阿桂於接奉此旨後將銅鐵預鍊備用欽
此四十一年正月公偕海蘭察額森特福康安等
合攻賊巢連用大礮轟擊並築長圍斷水道以困
之二月索諾木帶同兄弟妻子及頭目男婦二千
餘人乞降俘擒賊酋紅旗報捷金川平

阿文成
公年譜

公豐功偉績已見初編茲專就金川軍營鑄礮一

事節錄之以見掃平巨寇克奏膚功不徒弧矢之

威實兼礮火之烈因作礮考條列於後

松心
日錄

礮 潘安仁閑居賦礮石雷駭

屏案礮字始見於此

砲 正韻礮俗作砲 屏案砲字始見於此

拋 文選閑居賦注礮石今之拋石也

檐 說文檐建大木置石其上發機以碓敵也

屏案說文無礮字無砲字無拋字 拋見徐氏新附

據說文檐字解許氏以檐爲礮

太平御覽引春秋舊說檐發石車也

炮 礮又作炮借炮燔之炮其音匹孝切 徐鯤礮考

屏案礮本從石後有火礮遂從火作炮

歷代用礮

神農以石爲兵

越絕書

軒轅作礮

物原見格致鏡原

商殷商之旅其旂如林

說文引詩其旂如林以證發石

周周禮職金注以金石爲槍雷椎擗之屬

陸氏曰雷音誅

沈氏曰雷卽礮

徐氏養原曰擗又作桴桴通受說文受

字卽今拋字屏案漢時未有礮字周禮注之雷擗蓋卽礮石也

春秋左氏傳旂動而鼓

賈逵曰旂發石

范蠡兵法飛石重十二斤爲機發行二百

步

漢書甘延壽傳張晏注選閑居賦注飛石重二十斤

漢 鼂錯傳具藺石 如淳曰藺石雷石也

杜篤論都賦一卒舉礮

屏案礮卽周禮注之雷謂礮石也

後漢書袁紹傳曹操發石車擊紹

魏 蜀攻魏郝昭以繩連石磨擊其衝車

晉 麻狄攻枹罕爲拋車

太平御覽引崔鴻前涼錄

宋 宋書殷炎傳虞挹之造礮車擊之以石

唐 李密以機石攻城號將軍礮

史思明逼太原李光弼作大礮飛巨石一

發輒斃二十餘人賊乃退

屏案以上之礮皆石礮

火礮

宋太祖置弓弩院所造有炮

屏案火炮始見於此

疑此仍是石礮
寫者誤作炮耳

咸平四年劉永錫製手礮以獻

宋史

宋紹興三十一年金兵欲濟江虞允文伏

舟七寶山舟中發一霹靂礮礮墜水中硫

黃得水火自跳出紙裂而石灰散爲煙霧

眯其人馬之目金兵大敗

見楊萬里海
螭船賦序

屏案戰用火礮始見於此 此乃紙礮

用石灰以眯目非用礮子以攻擊也

金 金人守汴有鐵礮曰震天雷

詳見稗編

屏案礮用鐵始見於此

元 元世祖得回回所獻新礮法攻破襄陽世

謂之襄陽礮

屏案火礮守城始見於金火礮攻城始

見於元其礮之大小制度皆未詳

明 永樂間平交趾得神機鎗礮法

嘉靖二年佛郎機寇廣州指揮柯榮禦之
賊戰敗遁官軍獲其二舟得其礮卽名爲

佛郎機副使汪鋐進之朝

明史

佛郎機礮式以銅爲之長五六尺大者重

千餘斤小者數百斤

明史兵志

屏案礮用銅始見於此

大明天聰五年造紅衣大礮名曰天佑助威大將軍

崇德八年造神威大將軍礮

康熙十五年造神威無敵大將軍礮

康熙二十八年造武成永固大將軍礮

國朝造礮之式諸礮之名詳見

欽定皇朝禮器圖式蓋禮有五目軍禮居三故禮器圖中

兼載軍器此三代之宏規萬世之令典也

松心日錄

火藥

魏馬鈞製爆杖隋煬帝益以火藥雜戲

物原

屏案爆杖始見於此 火藥始見於此

造火藥法金湯十二籌所載頗詳硝磺炭

三者皆須研至極細擣至萬杵擣時不可

令絲毫砂土入藥內擣至數日後取出放

手心燃之藥燃去而手心不覺熱者方可

用炭用柳條如筆管大者去皮去節皮則

烟多節則易炸必須去淨也今人製火藥

或精於古人然法精而心或不慎每致害

事敬慎不敗執事者其念之

松心
目錄

余養疴江村辛丑冬日金醴香員外

菁茅

偕同志

於東郊練鄉勇演鎗礮邀往觀之礮小者二三千
斤最大者八千斤眼看點放霆震雷轟礮子打數
十丈穿土數尺是官軍之礮非不猛烈也所患者
承平日久將不知兵兵不知戰寇未至而礮已施
放寇將至而兵多遁逃如是則雖有巨礮亦奚濟
哉然則禦寇有要乎曰有首在得人得人有要乎
曰有首在練膽明戚少保撰練兵實紀有曰練膽
氣惟有膽故戰則同心敵愾守則衆志成城

松軒隨筆

摘句 洞中老衲記前身

公前世高僧耶七字指
來三生可證 詩話

曾受一

字正萬號靜菴廣東東安人乾隆三年舉人官四川長壽縣知縣署涪州知州有靜菴詩鈔

受一乾隆乙卯拔貢戊午登賢書總漕清江楊公以理學相期許有四書解義或問語類文集義纂及尊聞錄學古錄等書刊行初署珙縣歷署江津開縣綦江閬中廣安等州縣補長壽調署涪州所到民愛所去民思在珙縣則附祀名宦江津民建四知亭巴縣民建德政坊歸田九載著春秋解義易說兩書壽七十七歲道光二年纂入廣東通志

儒林傳長子思謙附貢生

東安縣志

曾靜齋入廣東通志儒林傳觀其生平所至民愛

所去民思則儒林而兼循吏也然非潘荻舫請輯

入詩人徵略則必繙省志然後知其入矣

松心文鈔

摘句 河山無帝子文字有書生

滕王閣

老夫但解臣稱表使者何妨橐載金

粵中懷古

禹績幾年忙泗鼎帝孫何處覓遺琴

彭城懷古

碧落雲開山異色紅塵夢斷鳥頻聲

浮遊羅浮

心共白雲還繞岫夢隨明月尙登臺

羅浮歸擢

移自伽陀從絕域蔭來禪寺幾傳燈

菩提樹

王世章

一名芝字九瑛號訥夫江西瑞昌人諸生有存吾園詩文集

訥夫閉戶讀書著作甚富家析產業悉與諸姪所

珍者古書百餘種耳

九江府志

先生爲人清簡幽穆翛然山水之外嘗與余言學者不洞悉五經四子書之根柢尋其條縷觀其會通使其理日夜流行於吾心如農夫不辨穀粟之種土地之性雖復努力終無所得故其爲文根本深厚議論醇正任意之所向錯綜揮斥皆與經義

相發明而不爲高奇無當之論先生少孤窮奔走
衣食愁苦迫結不肯少循人卒以自困嗚呼向使
先生壯盛時閒暇其身畢其才力於詩古文辭其
成就詎可量而才命相左如此豈文字於天地間
多寡詳畧其數有一定不可強致耶

節錄盛
樂跋

盛樂字水賓武甯人兄弟皆有文名時稱三盛雍
正間水賓舉博學宏詞水賓與訥夫爲莫逆交觀
其跋語傾倒甚至則訥夫之爲人可知矣柳坪比
部

式言

訥夫族姪也珍藏訥夫遺稿爲付梓以傳

古誼可風并識於此

聽松廬
文鈔

王訥夫遺稿僅存五言詩九首卽此數首由其性情風骨亦可想見因摘錄於左

送盛樂之洪州

驅車出東門出門竟何之
我有大宛種欲市無龍媒
聞君築高臺過君一鳴悲
自古權奇骨其中頗難知
不求千斗粟不絡黃金羈
但願遊八極籛雲至天池
天池洗毛羽歸臥南山陲

訥夫送盛樂一篇命意高超吐辭深遠令人想見魯仲連孔北海李太白蘇雲卿一輩人非襲

選體聲貌者所能僞託也

聽松廬詩話

摘句

雖有風濤寒不受爐火欺

浩浩元氣閉上下寂無聲相向深林裏冷

然納虛明

存吾園雪月

浩浩元氣閉上下寂無聲二句寫大雪

嚴寒較之傾耳無希聲在目皓已潔尤

爲清警

聽松廬詩話

下醫苦費人上醫苦費國

費國二字包史傳中幾多可慨事

同上

盛氏好弟兄結志在深谷而子捐百匳從

之學寂寞

贈汪軾 軾與蔣心餘友善 學寂寞三字可味 同上

國朝詩人徵略二編卷二十九

番禺張維屏子樹輯

楊 鸞

字子安號迂谷陝西潼關人乾隆四年進士官知縣有邈雲樓集

先生年十四入學丙辰舉於鄉己未成進士癸卯選隸爲令川中山水綿亘地多荒蕪先生下車卽勸開墾墾田日多居民日富上有升科之例始行報稅焉因事罷歸後改醴陵調長沙湖南民受漕糧之患先生曰彼令姑臧者何人我豈取脂膏自

潤者命平斛平收胥役不得折收包納暇日至嶽麓書院與掌教者登堂講課未幾聖吏議越二年補華容題邵陽邵陽苗徭雜居稱難治先生興學勸農如在長沙犍爲也分房考校所得多知名之士卒於乾隆四十三年壽六十七

聽松廬文鈔

二南遺音

此書輯陝西人詩殊覺簡略

關中兩朝詩鈔

此亦輯陝西人詩似較詳整

二百年來陝西名人如李

楷

孫

枝蔚

李

念慈王宏

撰李

因篤

王

又旦

康

乃心

全集皆未見豈道遠莫

致耶抑無人刊行耶可見者惟邈雲集耳

聽松廬詩話

成都雜詩

西風吹客夢來宿蜀王宮鴛瓦碎寒雨螭頭鳴夜
蟲都將千古意感此百年中欲問青城叟江干幾
落紅 魚水君臣契風塵指顧間祠堂仍翠柏原
廟舊青山漢業終應復師行竟不還異時懷感激
廢壘土花斑 歷歷降王恨悠悠割據心江山空
險塞樵牧幾登臨花蕊宮中落簫聲月下沉由來
剩歌舞祇隔碧雲岑 江山奇絕處工部草堂開
一臥浣花晚千秋天寶哀尙傳佳句法復憶出羣
才僕射能知己清秋五馬回

劍門

劍門高閣倚崔嵬蜀國風煙一線開怪石當關森
似削驚濤歎地殷如雷人矜絕險空詩筆天入中
原失霸才欲問勒銘千載事暮雲飛處亂猿哀

約遊山

郊原風物劇清涼塞雁青天已着行不必龍山堪
落帽菊花開日卽重陽

摘句 老子稱和光吾亦謂之然但恐不自立每
爲人所牽方將謝物累守已聊自全

淵明不學佛詩乃得佛理

友者我之半其半我所少所以貴切磋補

偏使之好

安知忤我者不與我爲藥

旣慚出岫雲復愧在山水

發甘州示書院諸子

客路三千里高堂七十人

留別諸弟

依慈勤學繡念父莫拋書

寄女

旅愁隨月滿鄉思入雲多

旅懷

雨伴愁邊酒雲迷夢裏家

除夕

客程猶昨日江上忽新年

元旦

疎鐘催遠夢殘燭耿鄉愁

醴陵

草草春情迷斷夢
星星離恨寄微波
盪胸天上明河水
結夢山中杜若香
浮雲影裏畱眞白
清鏡光中換渥丹
秦塞風煙來自北
楚人騷賦本從南
眼前樽滿卽佳節
客邸襟開惟友生
嬌兒解學家山語
弱女能談旅客情
儒林文苑都無分
萬一猶畱說部名

平陸呂氏女年七歲父死母欲改嫁女
哭死於父墓嗚呼孝女烈女鍾於幼女

事見楊子

余特表而出之

聽松廬
文鈔

安詩集

陳世熙

字廣颺號蓮塘浙江山陰人諸生有蓮塘詩鈔

先生弱冠補博士弟子員時齊侍郎召南主講戴
山書院賞之以爲有承明著作之才乃屢試不售
而尊甫性全君久客粵東先生於是奉母至粵先
生兼明申韓之學郡邑多延入幕所至有聲制府
楊公聞其名聘司章奏尤加禮焉硯田所入嘗至
三千金性全君卒將歸葬浙中有友業鹽筴虧帑
事發禍不測先生曾館其家賓主相得因慨然傾
所儲盡付之事遂解當是時先生義聲播嶺南愛

慕者益衆然歸貲既罄以故箸籍粵中嗣君雨田
補廣州庠生先生晚歲閉戶著書以詩文就正者
戶外屨滿一日方執筆改詩俄偃側弟子驚扶之
正襟而逝先生長孫其銘辛巳舉人次孫其錕丙
戌進士禮部主事次其銳候選知縣季其鉦江蘇

候補同知

陳蓮塘先生傳
龔主事自珍撰

漢時陳太邱父子皆有賢名一時傳爲德星聚然
著述罕有流傳吾粵陳獨漉詩有盛名尊人巖野
先生有集然亦僅兩世而止今蓮塘先生詩旣刊
行而令子雪濤上舍令孫心山大令棠溪禮部皆

工詩禮部所著古文駢體及詩詞尤卓然可傳而
先生曾孫遂舫廣文詩草亦時見佳句是則風雅
傳家四世有集固藝林之嘉話亦家乘之美談而
况蘭玉盈庭方興未艾先生之遺澤長矣

松心
文鈔

碧落洞余久聞其勝恨未得一觀今讀蓮塘詩有
云碧瀾寸寸皆秋色爲之神往碧瀾八字本周夔
文蓮塘取爲七字便成妙句

聽松廬
詩話

蓮翁有風傳人語碎五字可與唐人風暖鳥聲碎

句並傳

同上

摘句 鳥聲雲外樹人影水中樓

碧涵櫺葉雨紅醉蓼花霜

晚鐘何處寺新月故鄉情

一身爲客久萬事感懷多

丁未除夕

家園燈影外鄉夢酒痕邊

如何留滯客常送故鄉行

送人歸里

常於送人處憶得別家時唐人名句也蓮翁此十字可與並傳

十年塵跡江湖老千里歸心道路難

主客敢分牀上下弟兄只住屋西東

四面樓臺涵海氣六時鐘磬動天風

海珠寺

老來愈覺歲時速夢裏不知途路長

李隸中

字司五號星峯廣東龍門人乾隆十七年舉人官
萊蕪縣知縣臨清州同有蹈實山房詩集

隸中少聰慧與兄顯中弟晃中先後以縣冠軍補
弟子員第一隸中旋食餼學使夏之蓉吳嗣富刊
其文行於世乾隆壬申舉於鄉五赴禮闈四薦不
售壬辰大挑發山東老成練達上官倚重歷攝福
山黃縣夏津博山邱縣及德州州判事借補臨清
直隸州州同所在多善政權福山時有悍卒奪諸
生產廉得實按以法營主求免不得甚悍卒誣控

隸中上官知隸中誠懇爲白其誣反坐兵弁時論
快之其任黃縣值土寇騷擾臨清壽張各鎮會兵
進勦隸中辦理得宜人民安堵調宰萊蕪地瘠民
貧風俗獷悍夙號難治隸中視事甫半載舊俗頓
變有張某者利族弟貲財誣以亂倫占其田宅隸
中一訊吐實諭以大義兄弟感泣相友如初河南
河決至曹州界所經地方供給夫料隸中捐俸不
足貸粵商金墊辦郵書其弟晃中在家措償萊民
無秋毫之累相與立德政碑隸中力止之恭值

高廟東巡胥役里長私派侵漁隸中痛加懲治還所派於

駕俱蒙

恩加級

賜內緞荷包甲午庚子分校鄉闈得

民而捐廩自效萊人感激聯送冠服屏繖兩次接
士半捷南宮考童子試遇有年誼子弟請置前列
者輒拒絕之辛丑卒於任年六十二萊民如喪父
母踰年旋輓猶哭聲震野隸中厯宰六邑佐二州
不名一錢時稱山左清官第一所作感懷詩東人
傳誦之所著有蹈實山房詩文集二卷子兆霖步
雲歲貢生步衢附貢生步滄縣主簿步階諸生孫
芝蘭優廩生培蘭增生曾孫能馨廩生樹馨增生
元孫良玉廩貢生署吳川教諭

龍門縣志

此吾友鐵甫茂才

柱蘭

之伯祖也其孫

夢蘭

云先

祖事載龍門縣志惟詩稿散佚僅存七律一首余
觀龍門志所載有古循吏風至供給夫料郵書其
弟在家措償不欲累民此則州縣中罕有之事宜
乎餘慶綿延子孫曾元書香克繼然則廉吏可爲
固不徒身有令名已也

松心
文鈔

摘句

十年書劍遠飄蓬此日纔膺百里封

感懷

保赤有心愁學淺禦寒無策爲官窮

板橋直接荒城路野樹橫懸古廟鐘

但願爾民耕且讀訟庭花落鳥啼空

國朝詩人徵略二編卷三十三

番禺張維屏子樹輯

趙翼

字耘菴號甌北江蘇陽湖人乾隆二十六年

賜進士第三人官貴西道有甌北集

趙耘菴曰王西莊謂專用銀錢爲幣至明中葉始

定

見十七史商權

此說不然又曰顧亭林謂金哀宗正

大中民間以銀市易爲上下用銀之始

見日知錄

亦非

也又曰唐後五代民間已用銀但錢糧專徵銀

實起於明隆慶中

見陔餘叢考

珠海老漁曰天下熙熙皆爲利來天下攘攘皆爲利往自古已然於今爲甚今衆人之心所共趨者何物乎其銀乎夫銀不過土中所生之一物耳乃有此物而貧者富賤者貴卑者尊蠢者靈劣者優陋者文弱者武利權之重固如是哉夫利重則義輕利崇則義卑利強則義弱利顯則義微此富商豪賈得意之秋而盡臣志士隱憂之日也然而平天下未嘗不言理財也理財不外兩端一曰開財之源一曰節財之流居今日而言理財則銀爲當務之急請先言古銀後言今銀

老漁閒話

夏

梁州厥貢璆鐵銀

禹貢

案銀字始見於此 貢銀始見於此

虞夏之幣金爲三品或黃或白或赤

史記

殷

殷得金德銀山淦

史記

周

荊州其利丹銀

周禮

白金謂之銀

爾雅

上有鉛者下有銀

管子

秦

銀爲器飾不爲幣

漢書

漢

武帝制白金三品又造銀錫白金

漢書

案朝廷用銀始見於此 歲餘廢不行

王莽制銀貨朱提銀重八兩爲一流後不行

民以五銖錢市買

漢書

屬賓國以銀爲錢安息國亦以銀爲錢

漢書

案外夷用銀始見於此

蜀

先主平蜀賜諸葛亮等銀千斤

蜀志

案賜銀始見於此

梁

交廣之域以金銀爲貨

通典

案廣東用銀始見於蕭梁

止行於嶺外

周

河西諸郡用西域銀錢

文獻通考

案中國用外夷銀始見於宇文周

止行於邊郡

唐 憲宗詔曰銀無益於人採銀一兩者流他州

案唐時重銅而輕銀故禁採銀

裴延齡奏於糞土之中得銀十三萬兩

通鑑

案銀至十萬始見於此

元和十四年涇原節度使王潛進銀三千兩

太平御覽
引唐書

案大臣進銀始見於此

韓愈奏狀言五嶺買賣皆以銀

案閩粵通番船故用銀買賣

徵錢糧
不用銀

後唐 李繼韜母楊氏以銀數十萬兩賂莊宗之

宦官伶人并賂劉后繼韜由是得釋

五代史

案用銀行賄始見於此

慕容彥超爲僞銀以鐵爲質而銀包之

案僞銀始見於此

宋 眞宗澶淵之盟定以銀絹各三十萬兩正

宋史

案用銀和戎始見於此

仁宗景祐二年詔福建二廣歲輸錢易以銀

案錢糧徵銀始見於此

福建兩廣銀通行故聽民納銀

張行信疏稱洮州買馬銀百錠得馬千匹

金史

案北方用銀買物始見於此

僕見書少性又善忘不敢遽言始此言始見於此者就僕所見始於此也

金 章宗承安五年以舊例銀每錠重五十兩民

間或截鑿用之乃更鑄承安寶貨一兩至十

兩分五等

金史

案銀大錠小錠之分始見於此

元 文宗天祿元年天下課稅之數銀七萬七千

五百一十八兩

元史

案歲課銀止七萬可見元時徵銀甚少

明 洪武十九年詔歲解稅課有道里險遠難致

者許易金銀以進

明史

案詔許以銀代錢始見於此

銀之盛行蓋由此始

永樂中以鈔法不行禁民間金銀交易犯者

以奸惡論

明史

案宋行交子會子金元行鈔明洪永間猶行之弊僞百出未幾鈔遂廢而銀愈行

正統七年令各省不通河道之處糧米折銀

案許各省糧米折銀始見於此

萬厯初行一條鞭法夏稅秋糧皆徵銀

明史

案周秦漢皆用錢不用銀 魏晉至唐宋

皆多用錢少用銀

閩粵用銀他處不用

金元至明

銀漸通行至萬厯皆徵銀而銀始盛行

甌北詩已刻入前編茲又摘錄於後

袁蔣諸公詩文羅列案頭率題四律 錄一

插架新編燦列眉一堂風雅總吾師臨流欲唱公
無渡及席先愁某在斯此事不關官大小斯文真
繫世興衰許燕手筆高岑調都是開元極盛時

摘句 誰能沒世後傳世我亦衆人中一人

一編若論千秋業四海無過十數人

富貴豈如名有味聰明也要福能消

身退敢談天下事心齋惟對古人書

汗馬無功且汗牛

汗馬汗牛一武一文拈出新警 聽松廬詩話

周 周禮卅人掌金玉錫石之地而爲之厲禁以
守之若以時取之則物其地圖而授之巡其
禁令

管子言官山言鐵官

漢 犍爲朱提山出銀益州

町羊

山皆出銀

漢書地理志

後魏

延昌三年有司奏長安驪山有銀鑛

文獻通考

恆州又言白登山有銀鑛

唐

凡天下有銀者三十六縣

詳見唐書地理志

貞觀初侍御權萬紀奏宣饒二州銀大發采

之歲可得數百萬

唐書

憲宗元和三年詔天下有銀之山卽有銅銅可資於鼓鑄銀無益於生人現采銀宜禁

五代 東漢劉承鈞國用日削五臺山僧繼容募

民鑿山取鑛烹銀以輸劉氏賴以足用

宋 有銀之州四十一

詳見會要

有銀七十四州

詳見續會要

產銀有五十一場

詳見文獻通考

太宗至道末天下歲入銀十四萬餘兩

文獻通考

眞宗天禧末天下歲入銀八十八萬餘兩

神宗元豐元年是歲冶銀二十一萬餘兩

國朝詩人徵略二編卷三十四

番禺張維屏子樹輯

張九鉞

字度西號紫峴湖南湘潭人乾隆二十七年舉人
歷官江西廣東知縣有陶園詩集

先生歷官江西南豐峽江南昌廣東始興保昌海
陽知縣以艱去尋以海陽案牽連落職遍遊嵩洛
偃輦間晚歸湘潭主昭潭講席久之乃卒先生生
有異稟七歲能詩九歲通十三經及史鑑大略十
二歲補博士弟子員充乾隆辛酉拔貢生

廷試第一留監肄業考補正紅旗官學教習既舉京兆屢陞禮部試久之教習期滿得縣令所至有治聲先生才名震海內年十三登采石磯賦長歌人呼爲太白後身乾隆中西師奏捷

朝廷行郊勞禮方恪勤公觀承總督畿輔築郊勞臺先生爲賦樂歌大書其上詩文宏博浩瀚縱其力之所至而一軌於正當世誦其詩者至推爲乾隆

朝一大宗

沅湘耆舊集

陶園有羊報詩以大羊空其腹密縫浸以蠟油選卒縛羊背緣溜飛報河汛卽元世祖革囊法

松軒隨筆

九鉞父垣禱於南嶽而生九鉞七齡時攜之遊毘
盧洞寺僧異之曰郎君貌何類吾師之甚也因出
句屬對曰心通白藕九鉞應聲曰舌湧青蓮僧大
駭鳴鐘聚徒膜拜曰先師圓寂時畱此偶句云後
有對者卽我後身今郎君前生非吾師而何後九
鉞老且病一日其子世津自外入見其父戴僧帽
飄然而去追之不及亟入省九鉞伏枕如故惟口
吟云擔柴運米百無能自讀楞嚴自翦鐙夜半萬
緣鐘打盡前身南嶽一枯僧遂卒

湘潭縣志

紫峴先生詩余於詩人徵略初篇已刻之先生姪

孫小岫大令家栳寄來陶園全集又摘錄之松軒隨筆

標題 文德關 大栗關 打鐵關 斗郎箐

清浪灘 甕子洞 石壁俯太湖 同耿

湘門馮箕村坐五仙觀望懷聖寺塔 越

王臺 謁昌黎先生祠 滇陽峽以上五古

張文獻公嶺路手植松歌 引河曲 羊

報行 張義士殺虎歌 道州沈將軍祠

行沈名雲英郊勞臺歌 涪溪摩崖碑 桂

林觀黨人碑 光孝寺南漢金塗塔歌

襄城烈士行以上七古

昆明懷古

咸和門外草芊芊中有豐碑漢子淵豈是山川愁
使節恐教天子遇神仙雲霞人想文章氣金碧祠
荒禱祀年可惜大夫能諫議宮中只誦洞簫篇

子淵九原可作使見此詩當日不圖千載後得

此知己

聽松廬詩話

聞西師大捷

新拜嫖姚西出師風雷百道捲焉耆但聞苜蓿騰
天馬盡與壺漿擁漢旗士飽敵糧輕轉戰人歌零
雨定歸期藁街早使羣番懼不洗金刀斬郅支

陵川述古

東南莽莽霧連山舊駐偏師五度關萬騎愁緣青
壁上一夫坐制白雲閒草荒奪火聞熙吼湫裂黃
圍隔鳥還天險外臨人內守太平請勿弛防閑

陶園陵川述古七律八首畢秋帆尚書沅跋云

剴切詳明包括史事又合地形兵法成此奇作
吾願守茲土者書一通以置座右惜此集隘不
能盡登摘錄一首俾觀者得其崖略焉聽松廬詩話

陵川在昔爲磨咎如地見左傳其後爲上黨此所

云五度關奪火鎮皆三晉安危所係也同上

摘句

焦煙起渴石毒雨蒸青蘋微風不動搖瘴

大如車輪

打鐵關

毒嵐狀非一炎日出石勇巨瀑排巖開聲

挾盤江動

斗郎箐

陰崖天關交石截怒江面聲吹九地轉勢

激百靈戰

甕子洞

紅日一萬家浩浩皆春聲

襟爽軒

手把蒼梧雲散作江漢水

望九疑山

扶疏二百株其下皆香民

小嶺紅梅村

十萬青琅玕五百錦步障羅以太古雲秀

詭非一狀

滇陽峽

包羅地昏黃碎圻天蔚藍

廣武山

遙通九姓部高壓五城山

辰龍關

一梯穿鳥上萬馬踏天來

辰龍關

山攢銅柱密水劃鐵橋開

南中述古

海雲朝洗象山雨夜椎牛

雜興

勢面吾安用丹心汝豈難

過同子營

山川雜神怪日月轉鴻濛

登玉笥山

星轉地多影露流天有聲

晦日夜坐

地中飛白日天半走黃河

下羊腸坂

六龍負石開馳道萬馬盤梯作戰場

臺消戈鏃山無鬼血作桑麻地有年

萬水東來浮絕島九州南盡見名山

豈有神仙緣好色何妨兒女有深情

晉國九原思范會漢家三舍重桓榮

崔公爲大司成時陶園在國子監公以

國士待之後陶園至晉而公已下世因

追念知已感賦此詩崔公可謂知人陶

園此二句用事典切傳之藝林亦足以

報知已矣

聽松廬詩話

天下水惟南海大唐家碑牘此方尊

南海廟碑

風傳萬壑靈龜鼓月上三更瑋瑁潮

南海神廟

國朝詩人徵略二編卷三十五

番禺張維屏子樹輯

崔述

字武承號東壁直隸大名人乾隆二十七年舉人
官福建羅源縣知縣有考信錄

乾隆壬午秋先生與弟邁同榜中式嘉慶元年選
福建羅源縣知縣武弁多藉海寇邀功兵役亦藉
以漁利遇漳泉商船則索賄不與則誣爲盜送縣
羈候先生審明卽釋放於是奸徒控先生擅釋巨
盜巡撫汪公

志伊

知先生公正得免吏議四年調

署上杭縣關稅向有贏餘數千金先生悉解充洋面緝盜之費人或以為矯先生自行其心所安而已先生見縣令難行其志遂求退既歸著述自娛凡所著共三十四種而考信錄一書尤為生平心力所專注先生生於乾隆五年七月卒於嘉慶二十一年二月壽七十有七

崔東壁先生行略
門人陳履和撰

陳履和雲南石屏縣舉人遇東壁先生於京邸見考信錄即執弟子禮先生歿無子凡先生所著書履和一人刊行之先生之書不朽履和為弟子其篤於師弟之誼若此亦當附之以不朽矣

松軒
隨筆

吾師汪文端公爲考信錄序云東壁先生考據詳明如漢儒而未嘗墨守舊文而不求夫心之安也辨析精微如宋儒而未嘗空執虛理而不核夫事之實也志大而學正識高而心細其書爲古今不可無之書其功爲世儒不可及之功也吾師不輕許可而於是書心折如此

松心日錄

上古考信錄

二卷

崔述撰

謂易傳僅溯至伏羲

春秋傳僅溯至黃帝不應後人所知反詳於古人凡緯書所云十紀史記所云天皇地皇皆謬妄

謂龍馬負圖出於緯書乃方士之言 謂楊墨欲

高於儒者故稱述上古以求加於唐虞三代之上
凡稱引上古多異端假託之言不可以爲實事

謂上古各君其國各子其民有聖人出則天下尊
之爲帝旣歿則已焉自唐虞而後有禪自夏商而
後有繼不可以後世之事例上古 謂庖羲非太
皞神農非炎帝以五行配五帝乃陰陽家言

唐虞考信錄

四卷

崔述撰

謂舜事統於堯古但

有堯典今本割慎徽五典以下分爲舜典始於齊

代姚方輿其謬有三

詳見考信錄

謂堯非帝嚳子堯

之德能協和萬邦故天下歸之非藉父兄之業

謂厯數在躬非聖人之言聖人豈有置人事不
而以厯數爲據使後世閭閻千者得藉爲口實乎

謂人心道心二語出於荀子荀子凡引詩書皆稱
詩云書云獨此稱道經曰人心之危道心之微則
知荀子所見秦火以前之尚書無危微二語也

謂舜以前未有州舜始設之故曰肇十有二州其
後水患旣平乃併其三而爲九僞孔傳謂禹別九
州之後舜改爲十二州者謬 謂舜竄三苗於三

危何以復命禹征之何以舜之德久不能格舞干
羽而七旬遂格此僞書采韓詩外傳而增飾之耳

夏考信錄 二卷 崔述撰 謂彭蠡別一地非鄱陽

鄱陽名湖漢非彭蠡彭蠡自在江北爲漢水所匯
鄭樵以東滙澤爲彭蠡東爲北江入于海十三字
爲衍文固謬朱子蔡傳不疑以鄱陽爲彭蠡之誤
而反疑經爲誤亦非 謂庭堅非皋陶當是兩人
謂允征乃僞書義和廢職黜之可也何必興師動
衆義和黨羿羿必助之仲康安能征之且六卿分
掌六師甘誓所記甚明自周官始言司馬掌六師
而僞書周官篇因之夏時必無是語也 謂皋盪
舟非陸地行舟乃力能搖斟尋之舟而覆之也

商考信錄

二卷

崔述撰

謂元鳥生商當從毛傳

春分元鳥至祈於郊禘而生契不當從史記吞鳥

卵

謂湯誓言率割夏邑則知桀之政不行於諸

侯言夏罪其如台則知桀不能囚湯

謂湯未嘗

立桀之朝爲桀之臣

謂外丙仲壬當從孟子不

當從僞孔傳削去外丙仲壬兩代程子胡氏之說

皆謬

謂書言時則有若伊尹時則有若保衡明

是兩人僞孔傳從史記以爲一人者謬

謂巫咸

巫者氏也或先世嘗爲巫祝之官楚詞註以爲神

巫非也

謂祖甲乃武丁子非太甲當從馬鄭

豐鎬考信錄

卷八

崔述撰

謂履帝武敏當從毛氏

以爲從帝嚳之行不當從史記踐巨人跡之說不

解朱子何以亦從史記之言

屏案天生稷爲萬

世開粒食之先有不可以常理論者如有人道而

生子何爲棄之而寘之隘巷寘之平林寘之寒冰

詩又何以言不圻不副居然生子後人何以特立

姜嫄廟周官大司樂及斯干之文何以皆妣先於

祖此皆明著於經者非史傳雜說可比也天下固

有理所無而事所有者執目所未見遂以爲事所

必無則固且隘矣余從經而已非從史記也

松心
目錄

謂夏商周未有號爲某公者公亶父相連成文猶
所謂公劉公非公叔類也古公亶父猶言昔公亶
父也 謂太王流離播遷之不暇何暇謀商闕宮
詩語夸誕僖公乞師於楚以伐齊而此詩反謂荆
舒是懲則翦商一語何得信以爲實 謂齊魯韓
三家皆以關雎爲康王時詩關雎取興河洲而岐
陽距河絕遠况序但言后妃原未指爲何王之后
安得據一言而廢三家之說乎 謂文王未嘗稱

王詩何以言王在靈囿孟子但欲梁王與民同樂

故舉文王爲言

如憂心悄悄衛風也而以爲孔子
肆不殄厥愠太王也而以爲文王

謂周自立國於岐與商無涉文王未嘗立於紂之朝所謂服事殷者不過玉帛皮馬卑詞厚幣以奉之耳非委質而立於其朝也 謂文王羨里之厄詩不言書不言論語孟子亦不言至易傳始言之易傳本非孔子所作是以汲冢周易有陰陽篇而無十翼卽所云大難亦未言爲何難 謂武王牧野以前其事殷之心與文王不異孔子言周之德周者文武之統稱况上文所記者武王之言以爲論武而兼文則可若以爲專論文而不及武則上下之文不相屬矣 謂僞泰誓云惟十有三年春

不書月而反書時尙書有是文體乎又云惟戊午
王次于河朔蒙日於時而反無月不但尙書無此
文體卽春秋亦無此文體也 謂周介戎狄之間
乃商政所不及至寢昌寢大又商所不能臣紂與
文武原無君臣之分但爲名號正朔所存故論文
武者但問其實爲紂臣與否而不必問其伐商不
伐商果君臣也則曹操雖不篡漢而罪與丕無殊
非君臣也則武王雖伐商而至德與文王不異
謂周親二句承周有二句言周雖有親戚不敵善
人故大賚之上句周指武王下句周豈可指紂

謂唐叔乃成王母弟周公之東也唐叔實往歸禾則成王非幼明矣蓋成王居喪不言周公以冢宰聽政後人但聞周公攝政遂誤以成王爲幼耳謂管蔡二叔以殷畔漢以前皆不言霍叔至晉皇甫謐始稱監殷有管蔡霍三叔而僞尙書采之謂微子之命難於措辭而語但通套是僞書也謂儀禮非周公之制古禮臣拜君於堂下雖君有命仍拜畢乃升今儀禮君辭之遂升成拜是拜上非拜下矣一古者公之下不得復有公今儀禮諸侯之臣有所謂諸公者是春秋之末大夫僭也二

覲禮大禮也聘禮小禮也今儀禮聘禮之詳反十倍於覲禮蓋周衰覲禮缺失而聘禮通行故也三王穆后崩太子壽卒晉叔向曰王一歲而有三年之喪二焉今儀禮喪服篇爲妻期年果周公所制之禮叔向豈不知何以所言喪服與儀禮異四且十七篇多係士禮而文繁物奢已如此然則此書之作當在周末文盛之時周公所制必不如是

謂周禮條理詳備然以爲周公所作則非也書曰弼成五服至于五千孟子曰海內之地方千里者九今周禮封國諸公方五百里侯方四百里伯三

百里子二百里男百里天子邦畿之外分九畿畿
每面五百里海內安得如許之地而封之畿之一
古者建國必本大而末小今周禮天子之地僅四
諸公而諸公之地乃二十五倍於男邦正賈誼所
謂脰大如腰指大如股者是豈先王之法制乎

二

孟子曰其實皆什一也公羊曰什一者天下之中
正也今周禮乃云遠郊二十而三甸稍縣都皆無
過十二其非周公之法明矣

三

孟子曰廛無夫里

之布是正賦之外無課於民者今周禮使不毛者
無職事者出夫里之布其非周公之法又明矣

四

古者止有一郊祭天乃於郊祭地則於社今周禮云祭天南郊祭地北郊果爾則周公於洛何以一郊卽兼祭天地亦不當同日而郊春秋書郊凡九皆但書郊果有南北兩郊不應混而同之

五

謂共和者因周公召公二相和衷共攝而稱之也以爲共伯和者謬 謂今小雅篇次非當日之舊第出車爲宣王時詩非文王時詩南仲爲宣王時人非文王時人 謂據詩則宣王爲英主據國語則失德實多判然若兩人何也蓋詩主頌揚不無溢美國語所載多取諫辭諫必由於失道宣王在

位四十六年其初政實召穆公主之故能致中興之盛至國語所載伐魯及千畝之戰皆晚年事則宣王始終本異也 謂龍釐事荒誕不足信

謂伯夷叔齊無扣馬諫伐紂事辟紂故餓餓故思養而歸於周論語但云餓於首陽不言餓死於首陽蓋戰國時楊墨橫議常非堯舜薄湯武以快其私毀堯則託諸許由毀禹則託諸子高毀孔子則託諸老聃毀武王則託諸伯夷太史公尊黃老故好采異端雜說學者但當信論語孟子不當信史記伯夷求仁得仁辟紂歸周是卽聖之清者也

洙泗考信錄

四卷

餘錄

三卷

崔述撰

謂今論語

非孔門論語之原本亦非漢初魯論之舊本齊論
語章句多於魯論是齊論與魯論互異也張禹本
授魯論晚講齊論後刪而合之號張侯論然則今
之論語乃張禹所更定也嗟乎張禹但知媚王氏
以保富貴耳何足以知論語其不當刪而刪不當
采而采蓋不少矣如公山佛肸兩章蓋戰國之士
欲自便其私恐人譏已故誣聖人以自解而張禹
誤采之夫本未嘗往而誣之曰欲往此誣聖之大

者不可以不辨

佛肸畔乃趙襄子時事時孔子已卒公山事之誣詳見考信錄

謂孔子家語原書已佚今之家語乃魏晉間人雜取子史中孔子之事增益而成者 謂孔子事見於異端雜說者人猶不信至孔子世家孔子家語載之而名儒亦信之矣至孔子年譜則又采之世家家語及諸雜說者尤多謬妄 謂左傳言孔子相者相禮也非相國也史記誤以爲相國之相謂匡爲宋邑似畏匡過宋本一事匡人其如予何桓魋其如予何似一時一事之言記者小異耳 謂孔子在衛蓋孔文子留之言於衛君致饗餼於孔子故謂公養之仕非立其朝而食其祿也

謂孔子無刪詩書之事 謂先儒以春秋爲託南
面之權行黜陟之事此說非也蓋孔子修春秋所
關者天下之治亂所正者天下之名分不可仍以
諸侯之史目之故曰天子之事耳春秋得孔子修
之則善不待褒而自見惡不待貶而自明大義凜
然功罪昭著故曰孔子成春秋而亂臣賊子懼
謂孔子所謂一曾子以爲忠恕是卽忠恕也先儒
釋之曰一理渾然此渾然者果何物乎從曾子之
言則學者皆有所持循從宋儒之言則聖道反入
於虛杳吾甯從曾子之言不敢從宋儒之說也

謂南容非南宮敬叔以爲一人其誤有六

詳見考信錄

謂論語之左邱明非作左傳之左邱明左傳之左邱明未嘗親炙孔子劉歆謂親見夫子無所據

論語餘說

一卷

崔述撰

謂天下之理皆寓於事

事非聞見閱歷不能知故聖人教人多聞擇其善者而從之多見而識之曰我非生而知之者好古敏以求之者也又曰以思無益不如學也至宋始好以窮理爲說以靜坐爲功以明心見性爲道然則聖人何爲教人多聞多見乎 謂聖人教人惟務平實老莊佛氏別爲高論乃欲高出於聖人

孟子事實錄

二卷

崔述撰

謂孟子至梁不在惠

王三十五年當在後元十二年襄陵既敗之後蓋

惠王三十七年始僭稱王惟既稱王故孟子稱之

曰王惟既敗故有喪地之語

惠王改稱元年史記誤以爲襄王元年

謂後人疑孟子當尊周室不當勸齊梁行王政不

知周顯王時周已失國至東周君西周君判爲兩

國周已降同諸侯是時民困已極孟子急欲救民

故以王政歆動其心使勉爲保民之事此時而責

以尊周是不知時勢而妄議也 謂孟子七篇距

楊墨者甚多如告子許行白圭皆楊墨之流也

三代正朔通考

一卷

崔述撰

謂孔子修春秋以

尊王室斷無改本朝正朔之理王正月卽周正月也 謂三正並行於侯國列國自用其祿聖王不强使從己故周十二月卜偃謂之十月周三月絳老人謂之正月可見周用周正晉自用夏正也

三代經界通考

一卷

崔述撰

謂聖王治天下惟

期安民必不紛更以擾民夏貢殷助周徹各因其宜至諸侯之國各仍其舊公劉當夏殷之際而徹田爲糧可知夏殷貢助不盡行於天下也 謂方田法田不盡方而算自方井田之制亦若是耳

禘祀通考 一卷 崔述撰 謂禘見於春秋者二吉

禘于莊公

閔公二年

禘于太廟

僖公八年

觀此則太廟羣廟

皆有禘祭非祭始祖所自出之帝也禘見於左傳

者三

昭公十五年將禘于襄公

定公八年禘于禘公

昭公二十五年

此三事皆禘羣廟非祭始祖所自出也禘見於論

語者二所以不欲觀所以不答或問之故皆無明

文禘見於王制禮運郊特牲明堂位祭統祭義皆

無祭始祖所自出之說惟喪服小記及大傳云王

者禘其祖之所自出以其祖配之亦無祭始祖所

自出之說加始字於祖之上其誤實始於趙匡

謂國語多自相矛盾不足據即據國語禘饗之文

亦以其有功而祭非以其爲始祖所自出而祭也

祭法一篇出於漢儒蓋襲國語之文

有三謬詳見禘祀考

讀風偶識

四卷

崔述撰

謂齊魯韓毛均出於漢

三家之詩雖亡然見於漢人引述者有之與今詩

序互異豈毛詩獨可信而齊魯韓皆不可信耶

謂前人以詩序爲子夏毛公所作非有實據而衛

宏作詩序則後漢書實有明文

謂申公說詩疑

者不傳衛宏在後何以能篇篇悉其爲某人之事

謂風雅南皆詩之體

江沔汝漢在岐周之東不當言化自北而南

古文尙書辨僞 二卷 崔述撰 謂東漢以後杜林

賈逵馬融鄭康成傳古文尙書皆止二十九篇

謂史記所引尙書皆二十九篇之文並無今書二

十五篇一語 謂後人尊僞書不敢廢者以人心

道心數語爲宋以來理學諸儒所宗仰也不知危

微二語出荀子荀子又引道經實非尙書語也

易卦圖說 一卷 崔述撰 謂井勿幕而泉上行爲

政務使下情上達 謂已日乃革之不輕於革也

蓋弊雖當革然人已習而安之一旦革之或反以

擾民害有甚於未革者

按先生自言爲吏數年無大失得於井革二卦

二百年來考據之學盛矣然大都就制度名物辨
論之未有合唐虞三代聖君賢臣之事蹟而考究
之者東壁先生積三十年之心力成考信錄諸書
每事必究其原每書必核其實厯代史傳無不覽
而義必以經爲宗諸家論說靡不觀而理必以聖
爲準斥異端之謬妄不欲使聖賢受誣於後人扶
僞書之欺蒙不欲使名教致淆於雜說孔子謂多
聞慎言孟子謂博學反約先生當之無愧矣

松心
日錄

摘句 向山野藏其迂拙把功名付與英豪

未得見先生之詩僅見此楹聯因錄之
他日見詩當再補錄

喻寶忠

字元甫號心筠江西新城人乾隆三十一年進士
官吉州知州有遜志堂詩鈔

君先世爲建昌府新城縣人君考遷居南城矣子
孫猶貫新城籍君自新城縣學生中乾隆己卯科
江西鄉試丙戌科成進士君先以大挑一等得知
縣成進士後迺分發廣東所歷河源陵水翁源石
城四縣署南澳同知化州知州事嶺外命案好爲
詐僞吏每爲所罔君察傷泣獄能盡其聰明究其
情由又婉喻理義使之心服焉在石城值大旱災

君首捐財市米且勸富民出賑設粥廠七每鄉民所出米卽賑其鄉不足則取於縣又爲平糶施醫藥棺槨之法甚詳民賴以濟是時君積勞數月而鬚白以卓異擢山西吉州知州甫二年遂告歸時君年六十矣君少工文章在廣東四爲鄉試同考多得士及退歸衆推之主盱江書院成益多才君之歸也居於南城嘉慶十一年卒年八十有二子六宗衡縣學生崇緒國子監生崇勲舉人爲安仁縣訓導宗喻優貢生候選知縣宗嶠江蘇從九品宗嶧卒時有孫曾十三人

喻刺史墓志銘
姚太史鼎撰

乾隆己卯秋予典江西省試得新城喻子心筠之
文而激賞之其明年春心筠北來論文於京師相
得甚歡丙戌心筠成進士知粵東之河源而余按
士惠州汎舟唱酬於豐湖之上癸卯秋予典京兆
試而心筠知山西吉州己酉秋予校士建昌事竣
復得與心筠握話時心筠掌盱江講席慨然共念
曾子固李泰伯之遺矩迴憶前遊而同志者益少
也心筠以績學勤政之餘砥礪後進其子若孫亦
聯翩繼起而余與心筠皆白髮矣因約舉四十年
來論文不欺之素以復於心筠

遜志堂制藝序
翁學士方綱撰

心筠先生寶心見於政事苦心見於時文詩不多
作然卽事抒懷時有古樸之致偶摘錄之

聽松廬詩話

摘句 獨坐月親人天高憐月孤誰念沙水上浩

歌一老夫老夫還自得吹火向酒爐酒溫

睡已熟一夢到匡廬

舟夜

晨起聽啼鳥新聲盡春聲

春晴

獨坐忽懷古好風來故人

初秋

春江草樹色客子雲水情

送寧三之南昌

桃源一花放流水萬古春

世事新蝶夢老翁舊烏巾

吳壽昌

字泰交號蓉塘浙江山陰人乾隆三十四年進士
官翰林院侍講有虛白齋存稿

公由編修擢侍講 尙書房行走癸卯充廣西正
考官丙午貴州學政公厚重少言自奉樸素性耿
介不附權貴致仕後田園自娛怡養自適主講稽
山書院本經術以誨生徒游其門者多有成立云

吳蓉塘太史行述
汪敏齋撰

蓉塘先生奉

命視學貴州 皇十一子賦詩送行有句云詩卷爭教藏

石匱釣竿未許拂珊瑚枝是時先生在 上書房而

成親王尤爲氣味相得云

松軒
隨筆

我 朝乾嘉之際人才特盛海內稱詩者自蔣心
餘袁簡齋趙甌北以至黃仲則張船山諸公皆才
氣發越縱橫不可當獨山陰吳蓉塘先生所著虛
白齋詩雍容爾雅清虛靜遠無當時習氣意其爲
人亦必和平坦夷藹然可親乃久居翰苑以不附
權貴淡志仕進則又何耿介不可屈也其從孫潮
生茂才亦能詩隸籍吾邑以此集見示讀之想見
老成典型不可多得

虛白齋存稿書後
陳孝廉璞撰

茶宴 吳蓉塘有恭和

御製重華宮茶宴用五福五代堂聯句復成一律原韻詩
句云得名位祿欣兼壽多子孫曾喜及元出句名
位祿壽對句子孫曾元語如鐵鑄於此仰見

聖人德福之隆爲亘古所未有而當日在 廷諸臣颺拜

賡歌之盛亦千載罕觀者也

聽松廬詩話

貂褂 蓉塘有

恩賜貂褂詩句云貢傳鐵嶺推珍產儀重 金坡備表裘

朝儀惟貂褂許用表

謹按表者毛向外也古禮表裘不入

公門今表裘可當禮服惟貂褂耳而前人詩中罕

有及此者又按古有袪字無褂字後人稱袍上之
衣曰褂遂於袪字加卜字從卦爲音耳今姑就虛
白齋集中褂字書之

全上

文石 蓉塘有文石詩句云天然寫生手具此小
壘壘并序云文石產思南府之白鷺洲其石雲霞
巖壑草木禽魚花果昆蟲之狀錦繡龜貝之紋無
不各有真異觀也 文石可愛惜道遠難致

全上

革器 蓉塘有革器詩句云非陶非梓非裘箕塗

附燼脩成凝脂

以漆和牛骨
灰塗者最堅

貴州大定府有皮

器光滑輕巧觀此乃知漆和牛骨灰而成者

全上

永樂大典 蓉塘有恭和

御製命校永樂大典元韻詩句云祕書遷轉稽難定遺帙
紛綸覩莫全自注云此部乃嘉靖間再錄之本非
永樂原書又注云書計二萬一千九百七十三卷
今已缺什之一矣 謹按乾隆三十八年二月奉
上諭永樂大典有實在流傳已少其書足資啓牖後學廣
益多聞者卽將書名摘出撮取著書大旨叙列目錄進
呈欽此蓋自朱竹君先生奏言永樂大典內多有古書
世未見者請開局使尋閱於是開四庫全書館而
永樂大典中千百家之著述千百人之精神亡而

復存絕而復續固因儒臣奏請實由

聖主稽古右文使人間罕覩之書不至盡歸湮沒而諸臣纂修校閱得以石渠紬祕冊府垂名信乎紀文達所云非常之制作天如畱待於今希有之遭逢人

乃躬當其盛也

松心文鈔

百十三歲老人 蓉塘有百十三歲老人詩并記云

欽賜司業百十三歲老人王世芳元旦隨班行禮又注云翁之尊人壽百有三歲翁之長子年近九十真

熙朝人瑞也翁江真人其仕履俟再考

聽松廬詩話

吳蓉塘太史蚤躋詞苑屢掌文衡入直

上書房與皇子講習唱酬成親王尤禮重之其生

前可謂清華榮貴矣至歿後則其人既不能入

國史列傳而阮雲臺相國輯兩浙輶軒錄亦未載其

名數十年來談藝家罕有知吳蓉塘者而其從孫

潮生茂才漁以一介寒儒硯耕爲業乃能珍守遺

集欲以傳世請刻入詩人徵略洵可謂蓉塘之孝

孫而藝林之善士矣余故爲摘其佳句并取其可

以增廣見聞足資譚論者錄入編中以備覽觀且

慰潮生不匱之思焉

松心
文鈔

摘句

博聞聃史亞遺愛召棠侔

子產祠

蛾眉謠衆女魚腹葬孤臣

左徒廟

永甯南八死名在早見賀蘭生滅爲

黑神廟

黑神廟祀南將軍雲雲將軍應有廟祀然詩文中罕見因錄之聽松廬詩話

橫看海勢吞吳會遠送潮聲上富春

西興渡

詩果能工寧少達字原堪費不曾飢

下第

倚馬有才真八斗籠鵝無字不千金

應教

金管落花沉醉夜玉驄芳草冷遊春

單騎果傳回紇帳百蠻應奏尉佗書

平定金川

不愁天遠道俱遠最喜星回人亦回

澧州立春